

इवनिंग डोगरी न्यूज़ बुलेटिन

समे .1815

<><><><><><>

Headlines

1. प्रधानमंत्री नरेन्द्र मोदी होरें भारती संविधान दी गौरवशाली 75एं ब'रें दे जात्तरा दे सरबंध्यै च अज्ज लोकसभा च जारी चर्चा च हिस्सा लैता।
2. प्रधानमंत्री होरें मुख्य सचिवें दे चौथे राश्ट्री सम्मेलन दी अज्ज प्रधानता कीती ते तेज रफ्तार विकास लेई केन्द्र ते राज्यें बशकार सांझ-भ्याली गी बढ़ावा देने दी जरूरतें पर जोर पाया।
3. राजौरी च रहस्यमयी तरीके कन्नै होई दिएं मौतें दे मामले च एनआईवी पुणे, एनसीडीसी ते पीजीआई चंडीगढ़ थमां माहिरें दिआं टीमां जांच च सैह्योग देने लेई जम्मू पुज्जियां।
4. उधमपुर-श्रीनगर-बारामूला रेल लिंक परियोजना दे तैह्त् कटरा ते रियासी बशकार आजमाईशी ट्रॉयल रन तौले शुरु होग।
5. जम्मू च सीत लैहर होर तेज – रातीं दा घट्टोघट्ट तापमान 4 डिग्री सैल्सियस थमां हेठ दर्ज कीता गेआ ऐ।

<><><><><><>

PM LS Constitution

प्रधानमंत्री नरेन्द्र मोदी होरें भारती संविधान दी गौरवशाली 75एं ब'रें दे जात्तरा दे सरबंध्यै च अज्ज लोकसभा च जारी चर्चा च हिस्सा लैता। उनें आखेआ जे एह् स्हाड़े सब्बनें लेई बड़े गौरव दा पल ऐ। इस मौके पर उनें बाबा साहेब भीम राव अम्बेडकर ते संविधान सभा दे होरनें सदस्यें दिएं उपलब्धिएं गी चेतता कीता। उनें आखेआ जे स्हाड़े देसै दी नारि शक्ति नै देसै दे संविधान गी सशक्त बनाने च अहम भूमिका निभाई ऐ। श्री मोदी होरें आखेआ जे स्हाड़े संविधान नै शुरुआत थमां गै महिलाएं गी वोट पाने दा अधिकार दित्ता। उनें आखेआ जे भारत अज्ज महिलाएं दी अगुवाई च विकास पर चेचा बल देआ करदा ऐ। उनें सरकार आसेआ पास कीते गेदे नारि शक्ति वंदन अधिनियम दी बी सराहना कीती। उनें आखेआ जे इक जनजातीय समुदाय दी महिला दा भारत दे राष्ट्रपति दे औहद्धे तगर पुज्जना, स्हाड़े संविधान दी बढौलत गै मुमकन होई सकेआ ऐ। तौजे गै त्रीयै नंबरे दी अर्थबवस्था 2047 तगर पक्क गै भारत इक विकसत राश्ट्र होग। लोकसभा च संविधान दी 75 ब'रें दी गौरवशाली यात्रा पर टकोह्दी चर्चा लोकसभा च अज्ज परतियै रंभ होई। चर्चा दरान संसदीय कार्य मंत्री किरण रिजिजू होरें संविधान निर्माण च डॉ. भीमराव अम्बेडकर हुंदे योगदान दी सराहना कीती। उनें गलाया जे प्रधानमंत्री नरेन्द्र मोदी संविधान दी मुंडली भावना मताबक सबका साथ, सबका विकास, सबका विश्वास ते साबका प्रयास दे मंत्र कन्नै कम्म करा'रदे न। उनें गलाया जे देस नै आजादी मगरा सब्बने लेई बरोबर अधिकार जकीनी बनाए न। उनें इस गल्ला पर जोर भरेआजे देसे च अल्पसंख्यकें कन्नै कोई फर्कोफर्की नेई होआ'रदी ऐ ते उनेंगी कनूनी हिफाजत बी दोआंदी ऐ। चर्चा च हिस्सा लैंदे होई विपक्ष दे लीडर ते कांग्रेसी नेता राहुल गांधी होरें बीजेपी पर संविधान गी कमजोर करने दा आरोप लाया ते बेरोजगारी, अग्निवीर योजना करसाने ते महिलाएं खलाफ कथित अत्याचार दे मुद्दे पर सुआल पुट्टे।

<><><><><><>

One Nation One Election

इक राश्ट्र इक चुनाऽ कन्नै सरबंघत द'ऊं विधेयकें गी संगारें लोकसभा च पेश कीते जाने दा कार्यक्रम ऐ। केन्द्री विधि मंत्री अर्जुन राम मेघवाल होर 129मां संविधान संशोधन विधेयक ते केन्द्र शासित प्रदेश संशोधन विधेयक लोकसभा च पेश करडन। हाल च गै सरकारै मुख्य भरै च कन्नो-कन्नी चुनाऽ करोआने लेई इक राश्ट्र इक चुनाऽ दे प्रस्ताऽ पर विचार लेई खडेरी गेदी उच्चे अख्तियारें आहली समिति दिएं सफारशें गी स्वीकार कीता हा। साबका राश्ट्रपति रामनाथ कोविंद हुंदी अध्यक्षता च खडेरी गेदी इस उच्च स्तरी समिति नै सियासी पार्टिएं ते माहिरें-विशेषज्ञें सने सब्बन हित धारकें कन्नै व्यापक विचार बटांदरा कीता। इक राश्ट्र इक चुनाऽ दा सिद्धांत द'ऊं चरणें च लागू कीता जाहग। पैहले चरण च लोकसभा ते विधानसभा दे चुनाऽ कन्नो-कन्नी करोआए जाडन जदके पंचैतें ते नगर पालिकाएं ज्जेय मुकामी निकायें दे चुनाऽ, आम चुनाएं दे 100 दिनें दे अंदर करोआए जाडन।

<><><><><><>

Principal GMC(byte)

राजौरी जिले च इक पुरुष ते 6 बच्चें सनें 7एं जनें दी शुबे आलिएं मौतें दी जांच च मदाद करने लेई विषाणुएं दे जांच आली राश्ट्री संस्थान पुणे, पीजीआई चंडीगढ़ ते राश्ट्री रोग नियंत्रण केन्द्र एनसीबीसी दियां टीमां जम्मू पुज्जी गेइयां न। जम्मू थमां आकाशवाणी दे जिला संवाददाता नै दस्सेआ जे सरकारी मैडिकल कालेज जीएमसी दे प्रिंसिपल ते डीन डाक्टर आशुतोष गुप्ता होरें इक ब्रेस कांफ्रेंस च आखेआ जे सेहत मैहकमा हालात पर नेड़मी तक्क रखा'रदा ऐ ते हालात हुप काबू च न। सरकारी मैडिकल कालेज दे प्रिंसिपल ते डीन डाक्टर आशुतोष गुप्ता होरें आखेआ

<><><><><><>

NIA

राश्ट्री जांच अर्जेसी एनआईए नै शिव खौड़ी रनसू थमां कटड़ा जा'रदी तीर्थ यात्रिएं दी बस पर कीते गेदे आतंकी हमले दे सरबंघे च अज्ज इक आरोपी खलाफ आरोप पत्र दाखल कीता। एनआईए दे प्रवक्ता नै दस्सेआ जे एनआईए दी विशेष अदालत च दाखल कीते गेदे आरोप पत्र च अर्जेसी नै हिरासत च लैते गेदे आरोपी किम खान उर्फ हकीम दीप पर बक्ख-बक्ख दफाएं तैहत आरोप लाए न। एह हमला 9 जून 2024 गी कीता गेआ हा, जिसलै किश बेपंछानू आतंकिएं झंडी मोड़ कश कांढा पुज्जने पर यात्रुएं दी बस पर अन्नेबाह गोलीबारी कीती ही। हमले च 8 तीर्थ यात्रिएं सनें बस डरैवर दी बी मौत होई गई ही ते 41 जनें गंभीर तौरा पर जख्मी होए हे।

<><><><><><>

Rajmarg Sathi

भारतीय राश्ट्री राजमार्ग प्राधिकरण एनएचएआई नै शिड़क सुरक्षा गी बधाने ते जरनैली शिड़क पर गश्त गी निगगर करने लेई राजमार्ग साथी नां दा नमियां रूट पेट्रोलिंग गड्डिएं गी तैनात करने दी योजना बनाई ऐ। एह गड्डियां अज्जै कल्लै दियां संचार ते सुरक्षा उपकरणे कन्नै लैस होंगन। इंदे कन्नै शिड़क सुधार च मदाद हासल होग। इनें गड्डिएं च आर्टिफिशल इंटेलीजेंस वीडियो आले कैमरें होंगन लेह्ड़े पैदल दुरने आले लोकें सनें गड्डिएं पर लगे दे मुत्तलका शारें ते होर दुए बुनियादी ढांचे दी रिकार्डिंग करोग।

<><><><><><>

Announcement

आकाशवाणी जम्मू दे प्रादेशिक समाचार एकांश आसेआ कल दपैहरी 12 बज्जियै 10एं मितें पर सुगम्य भारत अभियान बारै 15एं मितें दे इक विशेष कार्यक्रम दा प्रसारण कीता जा'रदा ऐ। सुगम्य भारत अभियान, भारत सरकार दी इक विशेष पैहलकदमी ऐ जेह्दा मकसद दिव्यांग लोकें लेई समाज च इक निर्विघ्न ते साजगार म्हौल कायम करना ऐ। आकाशवाणी जम्मू दे प्रादेशिक समाचार एकांश आसेआ कल इस बारै प्रसारित कीते जा'रदे विशेष कार्यक्रम दा मकसद सरकार दिएं दिव्यांगें सरबंधी बक्ख-बक्ख कल्याणकारी योजनाएं बारै जागरूकता पैदा करना ऐ। कल इस कार्यक्रम दे बाद तुस पक्क गै एह्दे पर अपनी प्रतिक्रिया स्टाड़े कन्नै सांझी करेओ। एह्दे लेई स्टाड़ी ईमेल आईडी ऐ rnujammu@gmail.com

सुनदे र'वो आकाशवाणी समाचार जम्मू मीडियम वेव 990 किलोहर्ट्स, 104 इशारिया 5 मैगाहर्ट्स ते एफएम 100 इशारिया 3 मैगाहर्ट्स पर।

<><><><><><>

Tunnel T-33(byte)

केन्द्री रेल मंत्री हुंदे आस्सेआ उधमपुर-श्रीनगर बारामुला रेल लिंक परियोजना दी इक महत्वै आली कड़ी "सुरंग टी-33" दे कामयाब निर्माण दी घोषण दे इक दिन पैहले परियोजना दे मुख्य प्रशानिक अधिकारी यूएस बीआरएल संदीप गुप्ता होरें कश्मीर गी कन्याकुमारी कन्नै जोड़ने आली इस महत्वै आली ते रणनीतिक तौरा पर टकोह्दी थाहर रखने आली परियोजना बारे तफसीली जानकारी दित्ती। साढ़े रियासी आले संवाददाता देवेन्द्र ठाकुर हुंदे कन्नै गल्ल करदे होई परियोजना दे सीएओ संदीप गुप्ता होरें आखेआ

<><><><><><>

RBI Agriculture Loan

भारती रिजर्व बैंक नै बिजन जमानत दे कृषि दोआर दी हद्द इक लक्ख 60 ज्हार रपें शा बधाइयै 2 लक्ख रपे करने दा फैसला लैता ऐ। एह् फैसला अगले ब'रे पैहले जनवरी थमां लागू होग। राई-बाई ते करसानें ते कल्याण सरबंधी मंत्रालय नै आखेआ ऐ जे एह्दा मकसद करसानें गी बेहतर माली सुविधां उपलब्ध करोआना ऐ। इस फैसले कन्नै करसानें पर मैह्गाई ते कृषि दी बधदी लागत दा असर घट्ट होग।

<><><><><><>

National Lok Adalat (byte)

जम्मू-कश्मीर कानूनी सेवा प्राकरण आसेआ अज्ज उधपुर दे अदालती परिसर च राष्ट्री लोक अदालत दा सरिस्ता कीता गेआ जिस दरान बक्ख-बक्ख चाल्ली दे केई मामलें दी सुनवाई होई। आकाशवाणी दे उधमपुर संवाददाता अचिन दुबे दी रिपोर्ट मूजब, खास इस राष्ट्री लोक अदालत लेई खडेरें गेदे 11 बैंचें, राजस्व, बैंकें, सिविल, अपराधिक ते ट्रैफिक नियमों दी खलाफवर्जी मतल्लक 1 ज्हार 819 मामलें दी सुनवाई कीती। इस बारै आकाशवाणी संवाददाता कन्नै गल्ल करदे होई कानूनी सेवा प्राधिकरण उधमपुर दे सचिव अजय शर्मा होरें गलाया

<><><><><><>

Awareness Camp(byte)

सांबा जिले दी पंचैत छत्रवाल दे बसनीकें गी बाइखोयार बनाने दे मकसद कन्नै अपने चाल्ली दे इक नभें अंतर विभागीय जागरूकता शिविर च अज्ज कामयाबी कन्नै सरिस्ता कीता गेआ। हैंडीक्राफ्ट मैह्कमे दियां सहायक निदेशक इक्षु शर्मा ते सांबा दियां सहायक श्रम आयुक्त हिमानी जेरथ हुंदे सनें हस्तशिल्प ते श्रम मैह्कमे दे आला अफसरें बक्ख-बक्ख सरकारी स्कीमें ते हुंदे थमां होने आले मुमकन लाह् बारे तफसीली जानकारी देने लेईं लोके कन्नै सिद्दा संपर्क कीता। इस मौके बोलदे होई हस्तशिल्प मैह्कमे दियां सहायक निदेशकसांबा इक्षु शर्मा होरें आखेआ

<><><><><><>

PM-Raj Kapoor

प्रधानमंत्री नरेन्द्र मोदी होरें महान फिल्मी अदाकार राज कपूर हुंदी 100मी जयंति श्रद्धांजलि भेंट कीती। इक सोशल मरडिया पोस्ट च श्री मोदी होरें आखेआ जे राज कपूर होर छड़े इक फिल्मकार गै नेईं सगुआं इक सांस्कृतिक दूत हे जिनें भारतीय सिनेमा गी वैश्विक मंच पर पंछान दोआई। प्रधानमंत्री होरें फिल्में बक्खी राज कपूर हुंदे समर्पण दी सिफ्त कीती ते आखेआ जे उंदी फिल्में च कला, भावना ते सामाजिक सरोकारें कन्नै आम लोकें दिएं आसैं-मेदें ते जद्दाजहद गी दस्सने आलियां न। श्री मोदी होरें राज कपूर दिएं फिल्में च कदें नेईं भुलने आले किरदारें ते यादगीर गीतें दा बी जिक्र कीता, जेह्ड़े अज्ज बी हर कुसै दा मन मोही लैंदे न।

<><><><><><>

Weather

जम्मू-कश्मीर सने उत्तर भारत दे मते सारे हिस्सें च हर लंग्घदे दिनै दे कन्नै सीत बधदा जा करदा ऐ। खासतौर उप्पर रातीं दे बेल्ले तापमान च खरी मती गिरावट दर्ज कीती जा करदी ऐ। मौसम विभाग आसेआ दित्ती गेदी जानकारी मूजब जम्मू च कल जम्मू च अज्ज दिनै दा बद्धोबद्ध तापमान 20 इशारिया 5 डिग्री सैल्सियस जिसलै के जंदी रातीं दा घट्टोघट्ट तापमान 3 इशारिया 6 डिग्री सैल्सियस दर्ज कीता गेआ। मौसम विभाग नै 21 दिसम्बर तगर प्रदेश च मौसम खुश्क रौहने दी पेशगोई कीती ऐ।

<><><><><><>

